

Uunga siunnersuut: Ilinniarnertuunngorniartarnej pillugu Inatsisartut inatsisaata allanngortinneqarnera pillugu Inatsisartut inatsisaat

(Ukiut pingasut sinnerlugit sivilissusilimmik ilinniarfigerusutamut akuerisaanissamut ilassutitut piunasaqaatit)

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Saqqummiussissut**Siullermeerneqarnera**

Ilinniarnertuunngorniartarnej pillugu Inatsisartut inatsisaata allanngortinneqarnissaanut Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Siunnersuut naammagittaalliummik suliaasaqarfimmut Naalakkersuisoqarfimmit suliarineqartumit tunngaveqarpoq, tassa timersornermik sammiveqarluni ilinniarnertuunngorniarnermut qinnuteqartup timersornikkut piginnaasai tunngavigalugit itigartitaasimasoq naammagittaalliorsimagami. Naalakkersuisoqarfiup naammagittaalliummik suliaqarnermini paasivaa GUX-imi timersornermik sammiveqarluni ilinniarnertuunngorniarnermut akueritinnissamut piunasaqaatinik ilassuteqarnissamut malittarisassiortoqartariaqartoq tamannalu pillugu erseqqissumik inatsisitigut tunngaviliisoqartariaqarluni.

Siunnersuuteqarnikkut timersornermik sammiveqarluni ilinniarnertuunngorniarnermi aammalu siunissami ilinniartitaanerni allani ukiut pingasut sinnerlugit sivilissuseqartuni ilassutitut piunasaqaatinik malittarisassiornissamut ersarissumik inatsisitigut tunngaviliinissaq siunertarnejqarpoq.

Timersornermik sammiveqarluni ilinniarnertuunngorniarneq 2015-imi misiliutitut aallartippoq. Piffissami pineqartumi GUX Nuuk Elite Sport Greenland peqatigalugu suleriaatsimik timersornermik sammiveqarluni ilinniarnertuunngorniartunut atuuttussamik pilersitsinikuupput. Piffissaq misiliiffiusoq qaangiummat timersornermik sammiveqarluni ilinniarnertuunngorniarneq iluatsilluarsimasutut nalilernejqarpoq, tamannalu tunngavigalugu ukioq atuarfiusoq 2021/2022-mit timersornermik sammiveqarluni ilinniarnertuunngorniarneq ingerlalerpoq. Taamaalilluni timersornermik sammiveqarluni ilinniarnertuunngorniarneq misiliutitut ingerlajunnaarpoq.

Timersornermik sammiveqarluni ilinniarnertuunngorniarnermi ilinniartup ilinniaatigaluni qaffasissumik timersorsinnaanissaanik taamaasillunilu atuagarsornikkut timersornikkullu

piginnaangorsarnissamik periarfissaqarsinnaanissaa siunertarineqarpoq. Timersornermik sammiveqarluni ilinniarnertuunngorniarneq ilinniarnertuunngorniarniup sivilissusaanniit nalinginnaasumit ukiuni pingasuni ingerlanneqartumit ukiumik ataatsimik ilallugu ukiuni sisamani sivilissusilerlugu ingerlanneqartarpoq. Timersornermik sammiveqarluni ilinniarnertuunngorniarneq GUX-Nuummi neqeroortigineqarpoq.

Taamatut oqaaseqarlunga siunnersuut Inatsisartunut oqallisigisassanngorlugu ingerlateqqippara.